



Broj: UP-I-KSI-09-9/23
Datum: 14.04.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba zakona od strane D. S. iz Brčkog, ██████████, zamjenika direktora – rukovodioca bolnice, na 52. sjednici održanoj dana 14.04.2023. godine, donijela je sljedeće

RJEŠENJE

1. **UTVRĐUJE SE** da je D. S. iz Brčkog, ██████████ zamjenik direktora – rukovodioca bolnice, kao nosilac javne funkcije, koji je obavljao javnu funkciju do 30.09.2021. godine, postupio protivno članu 19. stav (1) i stav (2), i članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da dana 04.01.2022. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, Komisiji za odlučivanje o sukobu interesa nije prijavio nepokretnu imovinu bračnog druga.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, D. S. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Образложење

Komisija za odlučivanje o sukobu interesa je po službenoj dužnosti Zaključkom broj: UP-I-KSI-09-9/23 od 02.02.2023. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije D. S., zamjenika direktora – rukovodioca bolnice, koji je obavljao javnu funkciju do 30.09.2021. godine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 04.01.2022. godine od strane nosioca javne funkcije Komisiji i podataka

prikupljenih od nadležnih organa i institucija o nekretninama bračnog druga nosioca javne funkcije, jer nosilac javne funkcije nije prijavio odnosno unio u Izvještaj o imovinskom stanju nepokretnu imovinu bračnog druga, tačnije nekretninu označenu kao parcela broj [REDACTED], u ukupnoj površini od 611m², koju čine dvorište u površini od 447 m², stambena zgrada 1 u površini od 66 m², stambena zgrada 2 u površini od 71 m², gradilište 3 u površini od 10 m², pomoćna zgrada 4 u površini od 12 m² i pomoćna zgrada 5 u površini od 5 m² sve upisane u zemljišnoknjižni uložak broj [REDACTED] pravo građenja Julijana Stokić sa dijelom od ½, bračni drug nosioca javne funkcije, čime je postupio protivno članu 19. stavovi (1) i (2), i članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema Zaključka o pokretanju postupka, broj: UP-I-KSI-09-09/22 od 02.02.2023. godine, zaprimljen 22.02.2023. godine, D. S., zamjenik direktora – rukovodilac bolnice, kao nosilac javne funkcije je dana 28.02.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da je neprijavljena nepokretna imovina nasljedstvo supruge od njenih roditelja, da nije imao namjeru da prikrije pravo imovinsko stanje supruge, odnosno da se u konkretnom slučaju radi o nedovoljnom poznavanju načina na koji se popunjava Izvještaj o imovinskom stanju.

D. S. je Odlukom o izboru i imenovanju najuspješnijeg kandidata za prvog zamjenika direktora Javne zdravstvene ustanove „Zdravstveni centar Brčko“-rukovodioca Bolnice broj: 05-UO-013/17-2.1 od 14.09.2017. godine imenovan za prvog zamjenika direktora Javne zdravstvene ustanove „Zdravstveni centar Brčko“-rukovodioca Bolnice na mandat od 4 godine, dok je Odlukom o razrješenju dužnosti broj: 05-UO-014/21-6 od 21.09.2021. godine razrješen sa gore navedene dužnosti, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u BiH i inostranstvu, a u vezi sa članom 45 stav (4) Zakona.

Primjenom navedenih zakonskih odredaba na utvrđeno činjenično stanje, ocjenjeno je da u konkretnom slučaju postoji povreda Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da D. S. nije u Izvještaj o imovinskom stanju podnesenom dana 04.01.2022. godine Komisiji za odlučivanje o sukobu interesa, unio podatak o nepokretnoj imovini supruge, odnosno bračnog druga čime je postupio protivno članu 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Uvidom u Izvod iz matične knjige vjenčanih broj [REDAKTIRANO] od 15.08.2022. godine utvrđeno je da je nosilac javne funkcije D. S. dana 29.04.1984. godine sklopio brak sa D. J.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, a pri tome vodeći računa o težini i posljedicama povrede Zakona, te činjenici da je D. S., nosilac javne funkcije, koji je obavljao javnu funkciju do 30.09.2021. godine predao Izvještaj o imovinskom stanju za 2022. godinu u kojem je upisao podatke o predmetnoj nepokretnoj imovini, te se prema njegovom postupanju i odgovornosti, ličnosti nosioca javne funkcije, odnosu imenovanog prema kršenju odredaba Zakona kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici, radi o očito lakšem obliku kršenja odredaba Zakona, koje nisu nanijele štetu integritetu javne funkcije koju je D. S. obavljao, Komisija je stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik Komisije za
odlučivanje o sukobu interesa

Admira Mujić, dipl. pravnik

Dostavljeno:

1. D. S., [REDAKTIRANO], Brčko,
2. Internet stranici Komisije,
3. Evidenciji i
4. Arhivi.